



Äntwert vum Här Minister fir auswäerteg Ugeleeënheeten an Aussenhandel Xavier Bettel a vun der Ministesch fir Verdeedegung Yuriko Backes op d'parlamentaresch Fro n°1969 vum 24. Februar 2025 vum honorabelen Deputéierte Här Sven Clement.

Ad 1)

Säit dem Ufank vum russeschen Ugrëffskrich géint d'Ukrain am Februar 2022, huet Lëtzebuerg op alle Niveauen seng Ënnerstëtzung fir d'Ukrain gefestegt. Als Zeeche vun eiser kontinuéierlecher bilateraler Ënnerstëtzung huet Lëtzebuerg zesumme mat der Ukrain am Juli 2024 e bilaterale Sécherheetsaccord ënnerschriwwen. Dësen Accord geet esouwuel op déi militäresch an humanitär Hëllef, wéi och op déi politesch Ënnerstëtzung säitens Lëtzebuerg an.

Um europäeschen Niveau huet Lëtzebuerg all d'Sanktiounen ënnerstëtzt, inklusiv dem 16. Pak am Dezember 2024 an dréit d'EU Conclusiounen mat, déi fir méi eng staark Ënnerstëtzung vun der Ukrain plädéiere, wéi zum Beispill déi rezent Conclusioun vum europäesche Rot de 6. Mäerz 2025. Lëtzebuerg dréit finanziell och zu der Ukrain Facilitéit vun der EU bei, esou wéi bei de Programmer vun der europäescher Investitiounsbank an dem Internationale Wärfong.

Wat den humanitäre Volet vun eiser Ënnerstëtzung ugeet, huet Lëtzebuerg säit dem Ufank vum Krich en Total vu 96,2 Milliounen Euro un humanitärer Hëllef a Rekonstruktionshëllef fir d'Ukrain ausginn. Dorënner fale Contributiounen fir humanitär Hëllef am Kader vu Partneriaten mat UNO Agencen, dem Roude Kräiz an diversen humanitären ONGen, esou wéi d'Bereetstelle vu medezineschem Material, Kommunikatiounsmaterial a Material fir Feier ze bekämpfen esou wéi Generatoren. Wat d'Rekonstruktoun betrëfft, konzentréiere sech eis Efforten haaptsächlech op d'Beräicher Educatioun an Energie esou wéi d'Ënnerstëtzung vun Entreprisen am *Kryvyi Rih Distrikt*. En zousätzleche Beräich, op dee Lëtzebuerg och vill Wäert leet, ass den Deminage.

Fir eis Ënnerstëtzung un d'Ukrain um politeschen Niveau weider ze festegen, huet de Premierminister Luc Frieden de 24. Februar 2025 fir den 3. Joresdag vum russeschen Ugrëffskrich géint d'Ukrain online un engem Sommet zum Thema "*Unity Defense and Security Strategy*" deelgeholl an domat d'Solidaritéit vu Lëtzebuerg mat der Ukrain nach eemol ënnerstrach.

Ad 2)

Lëtzebuerg koordinéiert sech mat der EU um Niveau vu Bréissel an de verschiddenen Aarbechtsgruppen. Lëtzebuerg ass Member-observateur vun der *Ukraine Donor Platform*, eng G7 Koordinatiounsinstanz fir d'Rekonstruktionshëllef un d'Ukrain. Lëtzebuerg suivéiert och lokal Koordinatiounsinstanzen esouwäit et geet, zesumme mat der EU an der ukrainescher Regierung. Des Weideren ass Lëtzebuerg Member am *Core Group* fir d'Opsetze vun engem Spezial-Tribunal fir d'Aggressiounsverbrëche vu Russland juristeschesch ze verfolge. An als Member vun der internationaler Koalitioun fir d'Reckféierung vun ukrainesche



Kanner, setzt Lëtzebuerg sech dofir an, dass d'Kanner, déi a Russland zwangstransferéiert gi sinn, zeréck bei hir Familljen an d'Ukrain bruecht ginn.

Ad 3)

Lëtzebuerg suivéiert d'Situatioun um Terrain vun no, an ass a reegelméissegem Kontakt mat den ukraineschen Autoritéiten. Lëtzebuerg huet eng gewëss Flexibilitéit fir seng Hëllef gegebenefalls ze adaptéieren an/oder opzestocken, notamment an den Beräicher vun der Energie an dem humanitären Deminage wou d'Besoinne besonnesch grouss sinn. Nieft dësen Domänen, liwwert Lëtzebuerg och säit 2022 konsequent militäresch Ënnerstëtzung.

Lëtzebuerg, den 24. Mäerz 2025

Minister fir auswärteg Ugeleeënheeten an
Aussenhandel

(s.) Xavier Bettel